

Celebracion di 75 aniversario di biblioteca nacional

DIAMARS 20 di augustus, Prome Minister Evelyn Wever-Croes tabata presente n'e celebracion di e di 75 aniversario di Biblioteca Nacional. Un momento hopi special na unda Prome Minister tabata tin e oportunidad di duna un discurso expresando e importancia di e instituto aki. *"E edificio aki no ta uno di buki so, pero tambe di hendenan capaz, dedica y cu hopi aña di experiencia, cu a haci e 75 añanan di Biblioteca uno exitoso"*, tabata su palabranan.

Tambe e mandatario a expresa cu hopi t'esnan cu di chikito a bishita Biblioteca Nacional pa yuda nan den nan lesamento, of pa busca bukinan cu mester pa completa nan tareanan di scol. E instituto aki ta un luga na unda studiantenan di tur edad por bay sinta y studia den un ambiente calmo y sin disturbio y/of busca bukinan pa lesa, yudando asina engrandece nan conocimiento riba varios topico interesante.

Prome Minister a splica cu mirando con lihe e mundo di digitalisacion ta creciendo, den futuro lo enfoca den haci Biblioteca Nacional e centro caminda tur hende ta bay busca asistencia y/of ayudo pa loke t'e servicionan digital. Manera ta conoci, Gobierno ta den proceso di digitalisa su procesonan, y ta importante pa niun hende keda atras. Pues tur esnan cu no tin un computer of no ta asina habil riba computer, por yega na Biblioteca pa haya e ayudo necesario.

"Mi ta sumamente contento di a haya e oportunidad di por ta presente n'e celebracion aki, pa mi por gradici cada empleado cu ta tabata traha, ta traha y lo traha na Biblioteca, pasobra nan t'e exito di e instituto aki. Danki pa boso dedicacion, pasion y tur loke boso ta haci pa yuda cada cliente cu bishita e instituto. Masha pabien y cu Biblioteca por cumpli hopi aña mas, sirbiendo e comunidad di Aruba", Prome Minister a expresa.

